

Script of Morning Gojri News Bulletin 23 November 2025 at 1015Hrs

مارننگ گورجری نیوز بلیٹن مورخہ 23 نومبر 2025

یوہ آکا شوانی جموں ہے محمد امین انجم تیں خبر سُنو۔

LG Op Drishti

لیفٹنٹ گورنر منوج سنہا نے کمانڈ ہسپتال ادھم پور مانہہ انکھاں غا سلسلہ غا اک پڑا کیمپ غی اختتامی تقریب مانہہ شرکت کی۔ 4 روزہ اس کیمپ مانہہ فوجی ہسپتال دہلی غا ماہرین نے مو تیا بند غا اوپریشن کیا۔ فوج غی بے لوٹ خدمت غی تعریف کرتاں واں لیفٹنٹ گورنر نے کہیو جے اس قدم نے جموں کشمیر مانہہ امن تے ترقی واسطے ساز گا ر ماحول بنایو ہے۔ انہاں نے مزید کہیو جے لوکاں غی حفاظت عام شہریاں غی حمایت تے تندہی نال قوم غی خدمت کرن واسطے فوج ہمیشہ ہی آگے آگے رہی ہے۔ اسے دوران جموں کشمیر غا دور دراز ضلعان تیں آن آلا مریضاں غا 4 سو تیں متا اوپریشن کیا گیا ، جد کہ 2 ہزار تیں متا مریضاں غی جانچ کی گئی۔ قابل ذکر ہے جے 18 تیں 22 نومبر تک چلن آلا انکھاں غا علاج با رے اس کیمپ مانہہ نوکری کر رہیا جواناں سمیت محتاجاں ، ویر ناریاں تے عام لوکاں غی انکھاں غی صحت غی جانچ کی گئی۔ وزیر دفاع راجناتھ سنگھ تے فوج غا سربراہ جنرل اُندرہ دوویدی نے ورچول طریقہ نال اس کیمپ غی اختتامی تقریب سنگ خطاب کیو۔

CM MGNREGA

وزیر اعلیٰ عمر عبداللہ نے دیہی ترقی غا مرکزی وزیر شوراج سنگھ چوہان غو شکریو ادا کیو، جے جموں کشمیر واسطے ایم جی نریگا غے تحت کم غی حد 50 تہہاڑا ہور بدھا دتی گئی ہے۔ انہاں نے کہیو جے مالی تنگدستی ختم کرن واسطے اس قدم نال اک بڑی مدد ملے گی۔ وزیر اعلیٰ نے کہیو جے اس اہم فیصلہ نال حالیہ سیلاباں اور زمین کھسکن تیں متاثر ہون آلا ہزاراں گُناہاں ناتہ روز گار غا موقع تے ویلے سیر مدد ملے گی۔

JK Mine Auction

جموں کشمیر معدنیات تے ترقی غا اک نواں دور مانہہ داخل ہون واسطے تیار ہے، کیونجے وزارت برائے کان کنی یوٹی مانہہ چونا پتھر با رے ہون تک غی اپنا قسم غی پہلی نلامی پلک منعقد کرے گی۔ یاہ سنگ میل تقریب کنونشن مرکز کنال روڈ جموں مانہہ منعقد وے گی۔ جت کو نلا تے کان کنی با رے مرکزی وزیر جی کشن ریڈی، وزیر اعلیٰ عمر عبداللہ تے نائب وزیر اعلیٰ سریندر کمار چودھری غے ہمراہ موجود وین گا۔

CS Tourism

چیف سیکریٹری اتل ڈلو نے جموں پہر مانہ سیاحت غی شروعاتاں غو جائزو لین واسطے اک میٹنگ غی صدارت کی۔ میٹنگ غو مقصد خطہ مانہ سال پہر واسطے رنگ برنگی سیاحتی جگہاں مانہ بدلنو ہے۔ جائزہ میٹنگ مانہ بنیا دی ڈھانچہ غی ترقی ایڈونچر تے مذہبی سیاحت جیسا موضوع وزیر بحث آیا۔ اس موقع ور عہدیداراں نے کٹڑا، شو کھوڑی، اتر بینی پرمنڈل، چناب ریل پل، رنجیت ساگر جھیل تے مانسر غے نال نال ایڈونچر سرگرمیاں ور وی تبادلہ خیال کیو۔ چیف سیکریٹری نے بشمول ڈوگری کھانہ میلہ نالے اک سالانہ ہاف مراتھن، ڈیجیٹل فروغ ور زور پایو، تانجے سیاحت نانہ بابدو ملے، نالے مقامی روزگار پیدا ہو سکے۔

Kher IFFI

عالمی فلمی بھائی چارہ غے باندے اک تگڑی تھار بناتاں واں اداکار انوپم کھیر نے فلم سازاں نانہ کہیو ہے جے ویں اپنا کیمرا جموں کشمیر در موڑیں۔ ویں گوا مانہ منعقد ہو رہیا بھارت غا 56 واں بین القوامی فلم میلہ مانہ بول رہیا تھا۔ فلم غے قابل دنیا پہر غی جگہاں وچوں جموں کشمیر نانہ وی اک تگڑی تھار قرار دیتاں واں انہاں نے ہدایت کاراں تے پرڈیو سرز نانہ اپیل کی ہے جے ویں وادی غی امیر ثقافت نانہ بابدو دیں۔ اداکار انوپم کھیر نے کہیو ہے کہ جموں کشمیر مانہ فلم سازی نا صرف سینما نانہ مالا مال کرے گی بلکہ خطہ غی ثقافت نانہ مدد ملے گی۔

Prog Announcement

آکاشوانی جموں گا علاقائی خبرا غا شعبہ غی طرفوں "کالسریاں غے خلاف تشدد ختم کرن غی خاطر بین القوامی تیہاڑا 2025" غا موقع ور 25 منٹ غو اک خصوصی پروگرام نشر کیو جائے گا۔ یوہ پروگرام 25 نومبر دوپہر 12 بجے نشر وے گا۔ اس خصوصی نشر مانہ مہاری مہمان ویں غی ڈپٹی سپرنٹینڈنٹ جموں کشمیر پولیس فرحت نشاط پروگرام غی میزبانی مہاری اینکر شروتی کھجوریہ کریں گی۔

Search Op

سرحدی حفاظتی دستہ بی ایس ایف جموں غا جواناں نے جموں کشمیر پولیس غا خصوصی کارروائی گروپ اور سرحدی پولیس چوکی غے ہمراہ با ریں ضلع سانبہ غا گراں ریگل تے موّا غا گھنا جنگلی علاقہ مانہ سانجھا طور ور اک تلاشی کا روائی چلائی۔ کا روائی غو مقصد سرحدی علاقہ مانہ حفاظت برقرار رکھنو یقینی بنانو ہے۔ قابل ذکر ہے جے خطہ مانہ امن یقینی بنان اور درادازی نانہ روکن غی خاطر حفاظتی ایجنسیاں نے اعلیٰ چوکسی رکھی وی ہے۔

Bharat Darshan Tour

اک بڑی شروعات مانہ جموں سانبہ کٹھوعہ رینج غا ڈی آئی جی ے گل گلشن گرائونڈ جموں تیں ضلع سانبہ غا 93 طالب علماں نانہ بھارت درشن تور گا سلسلہ مانہ جھنڈی دس غے روانہ کیو۔ جموں کشمیر پولیس غا سوک ایکشن پروگرام غے تحت معقد اس

ٹور غے دوران طالب علم دہلی غے رستے حیدرآباد جائیں گا۔ اس کوشش غو مقصد
تعلیمی جانکاری مہیا کرانو، نالے قومی یکجہتی نانہہ بابدود ینو ہے۔ اس ٹور غے تحت
طالب علم کلیدی سائنسی، تاریخی تے ثقافتی جگہاں غی سیر کریں گا۔
